



嚴維集卷上

五言律詩

酬劉員外長卿見寄

蘇耽佐郡時
近出白雲司
藥補清羸疾
窓吟絕妙詞
柳塘春水漫
花塢夕陽遲
欲識懷君意
明朝訪檝師

酬王侍御西陵渡見寄

前年萬里別
昨日一封書
郢曲西陵渡
秦官使
者車柳塘薰
晝日花水溢
春渠若不嫌
雞

黍先令掃弊廬

酬普選二上人相期見寄

本意宿東林因聽子賤琴遙知大小朗已斷
去來心夜靜溪聲近庭寒月色深寧知塵外
意定後更成吟

送少微上人東南遊

舊遊多不見師在翟公門瘴海空山熱雷州
白日昏片心應爲法萬里獨無言人盡酬恩
去平生未感恩

宿法華寺

一夕雨沉沉哀猿萬木吟陰龍常護法長老
密看心魚梵空山靜紗燈古殿深無生久已
學白髮浪相侵

同韓翃員外宿雲門寺

小嶺路雖近仙郎此夕過潭空觀月定澗靜
見雲多竹翠煙深色松聲雨點和萬緣俱不
有對境自垂蘿

奉和呈甫冉大夫夏日遊華嚴寺

初地華嚴會王家少長行到官龍節駐禮塔
鴈行成蓮界千峰靜梅天一雨清禪庭未可
戀聖主寄蒼生

九日陪崔峒郎中北山燕

上客南臺至重陽此會文菊芳寒露洗杯翠
夕陽曛務簡人同醉溪閑鳥自群府中官最
小唯有孟參軍

荆溪館呈丘義興

失路荆溪上依仁忽暝投長橋今夜月陽羨
古時州野燒明山郭寒更出縣樓先生能館
我無事五湖遊

贈萬經

萬公長慢世昨日又隲官縱酒真彭澤論詩
得建安家山伯禹穴別墅少城干輒有時人
至窓前白眼看

秋夜行船

扁舟時屬暝月上有餘輝海燕秋還去漁人
夜不歸中流何寂寂孤棹也依依一點前村

火誰家未掩扉

別至弘上人

勗稱弘偃少早歲草茅居年老從僧律生知
解佛書衲衣求壞帛野飯拾春蔬章句無求
斷詩中學有餘

詠孩子

嘉客會初筵宜時魄再圓衆皆含笑戲誰不
點頤憐繡被花堪摘羅縠色欲妍將雛有舊
曲還入武城絃

送李端

故園衰草遍離別正堪悲路出寒雲外人歸
暮雪時少孤爲客早多難識君遲掩泣空相
憶風塵何所期

送桃巖成上人歸本寺

長老歸緣起桃花憶舊巖清晨雲抱石深夜
月籠衫道具門人捧齋糧谷鳥銜餘生願依
止文字欲三緘

酬耿緯拾遺題贈

掩扉嘗自靜驛吏忽傳呼水巷驚駟鳥藜牀
起病軀顧身悲欲老戒子力爲儒明日公西
去煙霞復作徒

送薛尚書入蜀

卑情不敢論拜手立轅門列郡諸侯長登朝
八座尊凝笳臨水發行旆向風翻幾許遺黎
泣同懷父母恩

一公新泉

山下新泉出泠泠此發源落池纔有響噴石

未成痕獨映孤松色殊分衆鳥喧唯當清夜
月觀此啓禪門

送李秘書往儋州

魑魅曾爲伍蓬萊近拜郎臣心瞻北闕家事
在南荒莎草山城小毛洲海驛長玄成知必
大寧是泛滄浪

自雲陽歸晚泊陸澧宅

天陰行易晚前路故人居孤棹所思久冒寒
相見初閑燈忘夜永清漏任更疎明發還須

去離家幾歲除

留別鄒紹先劉長卿員外

中年從一尉自歎此身非道在甘微祿時輕
耻息機晨趨本郡府晝掩故山扉待得干戈
畢何妨更採薇

贈送朱放

昔年居漢水日醉習家池道勝迹常在名高
身不知欲依天日住新自始寧移生事仍無
長惟將白接籬

陪皇甫冉大夫謁禹廟

竹使羞殷薦松龕拜夏祠爲魚歌德後舞羽
降神時文衛瞻如在精靈信有期夕陽陪醉
止塘上鳥咸遲

同王徵君湘中有懷

八月洞庭秋瀟湘水北流還家萬里夢爲客
五更愁不用看書帙偏宜上酒樓故人京洛
滿何日復同游

送崔子向

旅食來江上求名赴洛陽新詩宗謝守內學
似支郎行怯秦爲客心依越是鄉何人作知
已送爾淚浪浪

送舍弟

踈懶吾成性才華爾自強早稱眉最白何事
綬仍黃時暑嗟于邁家貧念聚糧祗應宵夢
裏詩興屬池塘

酬謝侍御喜王宇及第見賀不遇

寂寞柴門掩經過柱史榮老夫寧有力半子

自成名柳映三橋發花連上道明緘書到別
墅郢曲果先成

秋日與諸公文會天口寺

相訪從吾道因緣會爾時龍盤餘帝宅花界
古人祠明月虛空色青林大小枝還將經濟
學來問道安師

僧房避暑

支公好閑寂庭宇愛林篁幽曠無煩暑恬和
不可量蕙風清水殿荷氣雜天香明月談空

坐恬然道術忘

晦日宴遊

晦日湔裙俗春樓致酒時
出山還已醉謝客
舊能詩谿柳薰晴淺巖花待
閨遲爲邦父無
事比屋自熙熙

九月十日即事

家貧惟種竹時幸故人看菊
度重陽少林經
閨月寒宿醒猶落帽華髮強
扶冠美景良難
得今朝更盡歡

夏日納涼

山陰過野客鏡裏接僊郎
盥漱臨寒水褰鬪
入夏堂杉松交日影枕簟上
湖光袞袞承嘉
話清風納晚涼

示外甥

牽役非吾好寬情爾在傍
經過悲井邑起坐
倦舟航卜宅生應貴逢時學
可強無輕吾未
用世事有行藏

晚霽登王六東閣

試上江樓望初逢山雨晴連空青嶂合向晚
白雲生美惡列殊觀蕭條見遠情望來不可
極日暮水流清

嚴維集卷上

嚴維集卷下

五言排律

送丘爲下第歸蘇州

滄江一身客獻賦空十年明主豈能好今人
誰舉賢國門稅征駕旅食謀歸旋皦日媚春
水綠蘋香客船無媒既不達余亦思歸田

剡中贈張侍御

辟疆年正少公子貴初還早列公卿位新叅
柱史班千夫馳驛道駟馬入家山深巷烏衣

盛高門畫戟閑逶迤天樂下照耀剡溪間自
賤遊章句空為衰草顏

奉和劉祭酒傷白馬

沛艾如龍馬來從上苑中棣華恩見賜伯舅
禮仍崇鏡點黃金眼花開白雪驄性柔君子
德足逸大王風色點鳴珂淨聲連噴玉雄食
場恩未盡過隙命旋終練影依雲沒銀鞍向
月空仍聞樂府唱猶念代勞功

奉和獨孤中丞游雲門寺作

絕壑開花界耶溪極上源光輝三獨座登陟
五雲門深木鳴騶馭晴山躍武賁亂泉觀坐
卧踈磬發朝昏蒼翠新秋色莓苔積雨痕上
方看度鳥後夜聽吟猿異跡焚香對新詩酌
茗論歸來還撫俗諸老莫攀轅

水精環

玉室符長慶環中得水精任圓循不極見素
質仍貞信是天然端非因樸斲成無瑕勝上
美至潔過冰清未肯齊珉價寧同雜珮聲能

銜任黃雀亦欲應時明

奉和皇甫冉大夫祈雨應時雨降

政和知必感歲旱未書灾伯禹明靈降元戎
禱請來九成陳夏樂三獻奉殷壘掣曳旗交
電鏗鏘鼓應雷行雲依蓋轉飛雨逐車回欲
識皇天意為霖既在哉

贈別劉長卿時起河南嚴中丞幕府

早見登郎署同時跡下僚幾年江路永今去
國門遙文變騷人體官移漢帝朝望山吟度

日接枕話通霄萬里趨公府孤帆恨信潮
匡時知己老聖代耻逃堯

題鮑行軍小閣

宇下無留事經營意獨新文房已得地相閣
是推輪席上招賢急山陰對雪頻虛明先且
暮啓閉異冬春談笑兵家法逢迎幕府賓還
依負暄處時借在陰人

哭靈一上人

一公何不在空有遠公名共說岑山路今時

不可行舊房松更老新塔草初生經論傳緇
侶文章通墨卿禪林枝幹折法宇棟梁傾誰
復脩僧史應知傳已成

七言律詩

送崔峒使往睦州兼寄薛司戶

如今相府用英髦獨往南州肯告勞冰水近
開漁浦出雪雲初卷定山高木奴花映桐廬
縣青雀舟隨白露濤使者須應訪廉吏府中
唯有范功曹

九日登高

詩家九日憐芳菊逐客高齋瞰浙江漁浦浪
花搖素壁西陵樹色入秋窓木奴向熟懸金
實桑落新開瀉玉缸四子醉時爭講德笑論
黃霸屈為邦

送薛居士和州讀書

孤雲獨鶴共悠悠萬卷經書一葉舟楚地巢
城民舍少煙村社樹鷺湖秋蒿萊織妾晨炊
黍隅也耕童夕放牛年少不應辭苦節諸生

喜遇一封侯

餘姚奉寄鮑參軍

童年獻賦在皇州方寸唯思君與侯萬事無
成新白首兩春虛擲對滄流歌詩盛賦文星
動簫管新亭晦日遊知己欲依何水部鄉人
今正賦東丘

謝諸公宿鏡水宅

幸免低頭向府中貴將藜藿與君同陽鴈叫
霜來枕上寒山映月在湖中詩書何德名夫

子草木推年長數公聞道漢家偏長少此身
那比訪芝翁

題茅山李尊師所居

天師百歲少如童不到山中更不逢洗藥每
臨新瀑水步虛時繞最高峯籬根五月留殘
雪座右千年蔭古松此去人寰知近遠更看
路隔一重重

書情獻相公

年來白髮欲星星誤却生涯是一經魏闕望

來何日見商歌奏罷復誰聽孤根獨棄憇山
木弱質無成狀水萍今日更須詢哲匠不應
休去老巖扃

送房元直赴京

猶道樓蘭千萬師書生匹馬去何之臨岐未
斷還家目望月空吟出塞詩常欲激昂論上
策不應顛賴老明時遙知到日逢寒食彩筆
長裾會晉祠

書情上李蘇州

東土苗人尚有殘皇皇亞相出朝端手持國
憲群僚畏口喻天慈百姓安禮數自憐今日
絕風流空計往年歡誤着青袍將十載忍來
漁浦却垂竿

五言絕句

送人入金華

明月雙溪水清風八詠樓少年爲客處今日
送君遊

江南三月

江南季春天
尊菜細如絃
湖邊草作徑
湖上葉如船

六言

答劉長卿蛇浦橋月下重送之作

月色今宵最明
庭闌夜久天清
寂寞多年老宦
殷勤遠別深情
溪臨修竹煙色
風落高梧雨聲
耿耿相看不寐
遙聞遠柝山城

七言絕句

丹陽送韋參軍

丹陽郭裏送行舟
一別心知兩地秋
日晚江南望江北
寒鴉飛盡水悠悠

歲初喜皇甫侍御至

湖上新正逢故人
情深應不笑家貧
明朝別後門還掩
修竹千竿一老人

相里使君宅聽惠澄上人吹小管

秦僧吹竹閉秋城
早在梨園稱主情
今夕襄陽山太守
坐中流淚聽商聲

宿天竺寺

方外主人名道林怕將水月淨身心居然對
我說無我寂歷山深將夜深

荅劉長卿員外七里瀨重送

新安非欲枉帆過海內如君有幾何醉裏別
時秋水色老人南望一狂歌

發桐廬寄劉長卿員外

處處雲山無盡時桐廬南望轉參差舟人莫
道新安近欲上潺湲行自遲

嚴維集卷下

